



**PENYERAHAN CEK ... Dr. Abu Hassan Othman (kiri) menerima replika cek RM8.7 juta dari Ahmad Husni sambil disaksikan Najib.**

SERAMAI 1,163 PELAJAR UNIVERSITI MALAYSIA SABAH  
TERIMA PINJAMAN.

BORNEO POST -21 OGOS 1999.

## Seramai 1,163 pelajar UMS terima pinjaman

KOTA KINABALU: Seramai 1,163 pelajar Universiti Malaysia Sabah (UMS) sesi 1999/2000 menerima pinjaman berjumlah RM8.7 juta dari Perbadanan Tabung Pendidikan Tinggi Nasional (PTPTN).

Pelajar yang mendapat pinjaman itu terdiri dari 580 pelajar aliran sastera yang mendapat pinjaman RM6,500 setahun dan 583 pelajar aliran sains yang juga mendapat pinjaman RM7,000 setahun.

Sebelum itu, seramai 171 pelajar mendapat pinjaman itu bagi sesi 1998/1999 dan 303 pelajar sesi 1998/1999, menjadikan 1,637 pelajar UMS telah menerima pinjaman dari (PTPTN) sejak beroperasi sepenuhnya 1 November 1997.

Majlis penyerahan cek itu berlangsung semalam, di Kampus Tetap UMS di Teluk Sepanggar di mana Naib Cancellor UMS, Prof. Datuk Seri Panglima Dr. Abu Hassan Othman menerima cek itu bagi UMS yang disampaikan oleh Pengerusi Lembaga Pengurusan (PTPTN), Ahmad Husni Mohammad Handzalah.

Menteri Pendidikan, Datuk Seri Mohd Najib Tun Razak turut menyaksikan majlis penyerahan cek itu.

Semasa berucap pada majlis itu, Dr Abu Hassan

mengingatkan pelajar-pelajar UMS yang mendapat kemudahan pinjaman untuk mengikuti pengajian di universiti itu supaya menguruskan perbelanjaan pinjaman dengan baik.

Katanya, kebijaksanaan menggunakan kewangan dari pinjaman itu akan mencerminkan kewibawaan dan kebolehpercayaan terhadap diri para pelajar.

Menurutnya, kerajaan membelanjakan wang yang banyak untuk menyediakan segala kemudahan untuk para pelajar termasuklah bantuan kewangan pinjaman pendidikan tinggi. "Ini sebenarnya adalah pengorbanan kerajaan untuk keperluan sektor pendidikan seterusnya memberi bantuan kepada pelajar-pelajar menyambung pembelajaran mereka di institusi pengajian tinggi.

"Kerajaan juga berkorban dengan membelanjakan wang yang banyak demi menjamin keperluan pendidikan para pelajar tidak terjejas," katanya.

Justeru itu, beliau menasihatkan para pelajar supaya membalas pengorbanan kerajaan itu dengan belajar bersungguh-sungguh agar dengan ilmu yang diperolehi kelak dapat menyumbangkan khidmat yang terbaik kepada bangsa dan negara. - Oleh HASLIN GAFFOR